

Git ned mtu'ub Pabl ndo' Timoteo

Le'a git ndee git ned mke'a Pabl nabtsa ndo' xa nsalea' Timoteo. Le'a ta ndee no 2 Timoteo nsea Tito nak be git mtu'ub Pabl ndo' bexa nak pastor, bexa nchansu be xmen Cristo. Ndo' git ndee le'a Pabl mtenxe'a Timoteo xte'e ndon xkwa'a gun bexa sa nzhealbe bexa nak xmen Cristo.

Pabl nidi'izh ndo' Timoteo

¹ Le'a na' ndee Pabl, xa na ndun ti'in ten Jesucristo lak unibe'e Dios, xa na ngo'o beuna ndo' be ke ten beuna, no lak unibe'e Jesucristo Xwan beuna, xa na nge' ladna beuna. ² Nke'a na' git ndee ndo' lu Timoteo, le'a lu nak cuent xi'in na' ta na nge' ladna lu Cristo wa. Na'ab na' ndo' Tad Dios no ndo' Jesucristo Xwan beuna mas uzhe'eb utsin gak bexa ndo' lu, no mas ikwea' ladna bexa lu, no gun bexa wen yoo ladna lu.

Bexa na nluu be ta na'anpa gealngea

³ Lak una'ab na' ndo' lu zha na yamer gaa na' Macedonia, bya'an gezh Éfeso ba' ndontsa inibe'e lu ndo' be men na'anpa ulu'u bexa be ta na'anpa gealngea. ⁴ No ni lá ukencha' bexa be cuent na'an xti'in, cuent ten kwa'adpa be usan gox polta. Le'a be ta wa ndun nbeyoto'otsa bexa, na'anpa gakno-yá mas ige' ladna bexa Dios.

⁵ Li nibe'e na' ndo' lu ndontsa ta ugeaka ikwea' ladna bexa be ltsa'a bexa. Li syo'o gan gun bexa tal le'a lado'o bexa umbi'i nak, no tal le'a bexa

lá ndap ke ndo' Dios, no tal ige'ka ladna bexa Jesús. ⁶ Parea ncho bexa mla'a be ta wa, cha ndi ndeyoto'o bexa be ta na'an xti'in. ⁷ Le'a bexa wa nlad gak mech ten ley ten Dios, ndab bexa le'a ta nluu bexa ta ugeaka, parea le'a bexa ni lá nyakbe'ena xta'an ndadi'izh bexa.

Ley ten Dios dub ta wen

⁸ Le'a beuna uni'íka le'a ley ten Dios ta wenka, tal le'a beuna gunti'in-a lak nsabndo'-yá. ⁹ Le'a ley wa na'anpa nibe'e ndo' bexa ndun ta wen. Le'a-yá ndi nibe'e ndo' bexa ugap nak, bexa na lá nxobgek ndo' Dios, bexa ugap ndun, bexa ndap ke ndo' Dios, bexa lá ndap mod ndo' Dios, bexa nisi Dios, bexa ndut le'aka xus na no le'aka xna'a na, bexa ndut stubga men, ¹⁰ no bexa ngal stub xa na'anpa xa ten xa, no be xabgi'i ndal ladna le'aka ltsa'a bgi'i na, no bexa ndowa'an men, no bexa ukwi'in, no bexa ndun gealkwi'in ndo' juez, no bexa ndun stub ta'a na'anpa nak lak nak gealngea ten Dios. ¹¹ Le'a gealngea wa di'izh wen ten Dios xa ndon le'a wen, ta msa'a Dios ndadi'izh na' ndo' be men.

Pabl ndun ti'in ten Jesucristo

¹² Nsa na' xno ndo' Jesucristo Xwan beuna xa ndakno na', le'a xa mna' le'a na' sun lakka nlad xa, ta we'e mso' xa na' gun na' ti'in ten xa. ¹³ Le'a polta ndi unisi na' Jesucristo, no ukesankea na' tso'o be xmen Jesús, no mtsaksi na' bexa. Parea le'a Dios mkwea' ladna na', geal le'a na' galka lá iní ti ugap nak ta li mbin na' wa, zha na bi lá ndangea lad na' Jesús. ¹⁴ Le'a Dios uzhebpa utsin mbinno na', no ndun xa mas nge' lad na'

xa no mas nkwea' lad na' be men, ta na nak na' xmen Cristo Jesús.

¹⁵ Le'a ta gáp na' ndee ta ugeaka, nsabndo' itea be men gungea ladna le'a Jesucristo mbi'id ndo' gizhliyo ndontsa ko'o xa bexa ugap nak ndo' be ke ten bexa. Le'a lat itea bexa ugap wa le'a na' ndee ndon le'a mas ugap ngok. ¹⁶ Ná le'a Dios mkwea' ladna na', ndontsa ini'í be men xte'e mbinge' ladna Jesucristo ndo' na', cha no bexa gungea ladna Jesús. Cha li gap bexa gealnaban ndo' Dios, ta nunk lá idub. ¹⁷ Le'a Dios le'a nak xa ndon le'a nibe'e idub tiemp, na'anpa gat xa no na'anpa na' beuna xa. Le'a xa nabkama nak Dios xa ndon le'a ndák. Idub tiemp gap beuna mod ndo' xa, no gab beuna le'a xa uzhebpa dub xa juert. Lika nak-a.

¹⁸ Le'a ta ndee ndáp na' ndo' lu Timoteo le'a lu cuent nak xi'ín na': bin ti'in ten Dios idub ncho ladna lu, lak ndabka bexa gun lu, bexa ndadi'izh sakndo' Dios. ¹⁹ Dubtsa bge' ladna lu Jesucristo no bin laktsa nsabndo'-yá. Lá gun lu lak ndun ncho bexa mla'a nes ten Dios, ²⁰ lak mbin Himeneo no Alejandro. Le'a nat mla na' bexa gunno maxu'u bexa lak nlad maxu'u, ndontsa yá lá inisita bexa Dios.

2

Xte'e nsabndo' gudi'izhno be men Dios

¹ Ndon ned ta ndee gáp na' ndo' lu: unab ta nki'in lu ndo' Dios, no bidi'izhno Dios, no unab ndo' Dios gakno Dios itea be men, no bsa'a xno ndo' Dios. ² No unab ndo' Dios gakno Dios bexa nakti'in no itea bexa nibe'e. We'e gust yoo beuna

no wen yoo beuna, no idub tiemp uxobgek beuna ndo' Dios no utsin gak beuna ndo' be men. ³ Le'a Dios xa na ngo'o beuna ndo' be ke ten beuna isak ladna tal li gudi'izhno beuna xa. ⁴ Le'a xa nlad itea be men ito'obe ndo' be ke ten na, cha igondo' bexa gealngea ten Dios. ⁵ Le'a Dios dubkama ncho, no ncho dubtsa xa sun gan wen ya'an beuna ndo' Dios, le'a ta wa Jesucristo, ⁶ xa na msa'a le'aka le'a xa ngut sakndo' itea be men, gor na nsabndo'ka li gun xa wa. ⁷ Ta we'e le'a Dios mso' na' gudi'izh na' be ta ndee, no mtu'ub xa na' gauluu na'-yá ndo' bexa na'anpa xa Israel ndontsa gungea ladna bexa gealngea ndee. Le'a Cristo nsobwi'i le'a ta ndáp na' ndee ta ugeaka, na'anpa gealkwi'in-a.

Xte'e nsabndo' gak be xabgi'i no be xagots

⁸ Le'a na' nlad le'a guni'i pa nyakjunt be xmen Jesús, gudi'izhno be xabgi'i Dios no ixits bexa ya'a bexa ndo' Dios, no umbi'i gak lado'o bexa, no na'anpa igi'i bexa, no na'anpa kuyo bexa. ⁹ No nladga na' gak be xagots be xab na dub mod na na'anpa ugap iwi'i be xabgi'i ndo' xa, no na'anpa izhinnona bexa be lad ndap bexa. No na'anpa uzhe'eb usaxkwa'a bexa gek bexa. No na'anpa uzhe'eb gunti'in bexa be ta oro no perla no be lad ndon le'a uyap. ¹⁰ Ndi gun be xagots sbe'en be ta wen, lak nsabndo' gun be xagots ndankea Dios. ¹¹ Le'a be xagots wa nsabndo' xetsa ula'ach ta ndab xa nlu'u di'izh ten Dios, ni na'an xte'e gab bexa. ¹² Le'a na' ndáp le'a be xagots lá nsabndo' ulu'u, no na'anpa ndi le'a be xagots inibe'e be xabgi'i sa nda'utsid bexa di'izh ten Dios. Le'a be

xagots wa nsabndo' xetsa kwe, ¹³ geal le'a Dios ned Adán mbinde'e, we'eta mbinde'e xa Eva. ¹⁴ Le'a maxu'u na'anpa ukwi'inno Adán, le'a xa ndi Eva mkwi'inno, cha mbin Eva dub ta lid le'a nak ndo' Dios. ¹⁵ Parea le'a ta na ndap be xagots me'ed, le'a Dios sgo'o bexa ndo' be ke ten bexa tal le'a bexa lá ula'a nes ten Dios, no ikwea' ladna bexa be ltsa'a bexa, no umbi'i gak lado'o bexa ndo' Dios.

3

Xte'e nsabndo' gak bexa yansu be xmen Cristo

¹ Le'a ta gáp na' ndee ta ugeaka: Tal ton dub xa nlad yansu be xmen Cristo, le'a ta nlad xa wa ta wenka. ² Parea le'a dub xa nchansu be xmen Cristo nsabndo' utsin gak gast na'an ton gab le'a xa ugap nak. No dubtsa xagots nsabndo' gap xa, no wen gunbe'e xa, no list gak xa, no utsin gun xa ndontsa gap be men mod ndo' xa, no utsin gak xa ndo' itea be men ncha'a ta lid xa, no isu'u xa ulu'u xa be men. ³ No lá gun xa gealgu, no na'anpa ukwa'an xa uyo, no na'anpa ukwi'inno xa be men natsa gun xa gan med. Ndi nsabndo' utsin gak xa, no bcha'an gak xa, no lá ukwa'an xa sian med. ⁴ No nsabndo' utsin ula'ach xa bexa ta lid xa. Le'a be xin xa wa nsabndo' uxobgek ndo' xa, no gap be xin xa mod ndo' xa. ⁵ Le'a tal ton lá isu'u ula'ach ta lid na, le'a xa liga lá isu'u yansu gezh ten Dios. ⁶ No le'a dub xa ti'i mbingea ladna Cristo lá nsabndo' gak xa yansu be xmen Cristo, ndontsa lá izhinna xa, cha utsaksi Dios xa lak utsaksi Dios maxu'u. ⁷ No nsabndo' utsin gak xa, ndontsa gap be men mod ndo' xa, bexa na'anpa

nak xmen Cristo. We'e le'a xa wa na'anpa ido ladna, no lá gaila' xa ndo' ya'a maxu'u.

Xte'e nsabndo' gak bexa gakno be xmen Cristo

⁸ No liga le'a bexa ndakno be xmen Cristo nsabndo' gak dub xa gap be men mod ndo' na. Lá nsabndo' gun xa gealkwi'in. No na'anpa gun bexa gealgu. No na'anpa ukwi'inno bexa be men ndontsa li gun xa gan med. ⁹ No uxobgek bexa ndo' di'izh wen ten Dios idub ncho ladna bexa. ¹⁰ Le'a bexa gakno wa nsabndo' ned gak preb naga ndun xa itea be ta ndee. We'eta gak xa ti'in wa, tal xa utsinka ndun. ¹¹ No liga le'a be xagots nsabndo' utsin gak. No na'anpa gudi'izh bexa be cuent gix, no wen gunbe'e bexa, no utsin gun xa itea be ta'a ndontsa ige' ladna be men xa. ¹² Le'a be xabgi'i gakno wa nsabndo' gap dubtsa xagots. No utsin ula'ach bexa be xin xa no iteata bexa ta lid xa. ¹³ Le'a bexa na wen ndun ti'in ndakno be xmen Cristo wa, liga ndun gan ndap be men mod ndo' na, no na'anpa izheb bexa gudi'izh bexa ta nge' ladna bexa Cristo Jesús.

Be xmen Cristo ndeno gealngea mluu Dios

¹⁴ Ndanbe'e na' le'a na' sken gal ina' lu. Le'a na' nke'a be ta ndee ndo' lu, ¹⁵ ndontsa tal na' na'anpa cha gal, yá uni'í lu xte'e nsabndo' gak lu no itea bexa nak xmen Dios, le'a beuna nak xmen Dios nban, no lá ula'a beuna initndo' gealngea ten Cristo. ¹⁶ Ta ugeaka le'a ta uga'ach mlu'u Dios ndo' beuna dub ta uzhe'eb si'il nak:

Le'a Dios mbi'id ndo' gizhliyo, myak xa men.

Le'a Espíritu ten Dios cha mluu le'a xa Xinka Dios.
 Le'a be angel ten Dios cha uni'í xa.
 Le'a di'izh ten xa mgen itea be nacion.
 We'e le'a be men mbingea ladna xa.
 Cha nsea' xa gibe'a.

4

Bexa ukwi'inno be xmen Cristo

¹ Parea le'a Espíritu ten Dios uya'al ndab le'a be wizh lult wa ncho bexa ula'a ta na nge' ladna bexa Dios. Ndi ula'ach bexa ta gudi'izh be mbi bxin ukwi'in, cha isankea bexa tso'o be ta wa. ² Le'a bexa wa gungea ladna ta nluu bexa ukwi'in, bexa na ndab nluu gealngea parea gealkwi'in-a, gast ni lá ndo ladna bexa no be ta ugap ndun bexa wa. ³ Le'a bexa ukwi'in wa uka uchilya'a be men, no gab bexa ncho be ta'a lá nsabndo' gaw be men. Parea le'a Dios mbinde'e be ta wa ndontsa usa'a beuna xno ndo' Dios, cha gaw beuna-yá, beuna nak be xmen xa, no nchando' beuna gealngea ten xa. ⁴ Le'a itea be ta'a mbinde'e Dios sbe'en ta wen, syo'o gan gaw beuna-yá tal le'a beuna usa'a xno ndo' Dios. ⁵ Le'a beuna syo'oka gan gaw-a, ta na li ndab di'izh ten Dios no ta na nsa'a beuna xno ndo' Dios.

Xte'e gak bexa ndun ti'in ten Jesucristo

⁶ Tal le'a lu nluu be ta ndee ndo' be xmen Cristo sa ba', le'aka ndun lu ti'in ten Jesucristo. Le'a be di'izh ten Dios ta ndangea ladna beuna wa, no gealngea ten Dios ta nxobgek lu ndo' na wa ndun gan mas juert gak lu. ⁷ Lá ula'ach lu be

cuent gizhliyo, be ta na'an xti'in, ndi mas ulo gan gun lu ta nsak ladna Dios. ⁸ Le'a bexa ndun ejercicio, le'a ta wa ndaknoka bexa. Parea le'a ta na ndun beuna ta nsak ladna Dios, le'a ta wa ndun wen yoo beuna tiemp nat no tiemp ti'i ilen. ⁹ Le'a ta ndee wa ta ugeaka, nsabndo' itea be men gungea ladna-yá. ¹⁰ Ta we'e ngo beuna gan ndun beuna ti'in ten Dios, geal le'a beuna nge' ladna Dios nban, xa na ngo'o be men ndo' be ke ten bexa, bexa na ndangea ladna Dios.

¹¹ Le'a be ta ndee wa nsabndo' uluu lu no inibe'e lu ndo' bexa. ¹² Maska ben lu le'a bexa nsabndo' gap mod ndo' lu. Ta we'e nsabndo' utsin gudi'izh lu, no utsin gak lu, no ikwea' ladna lu bexa, no gun lu lak nlad Espíritu ten Dios, no ige' ladna lu Cristo, no umbi'i gak lado'o lu. Tal le'a lu li gun, le'a bexa ini'í xte'e nsabndo' gun bexa. ¹³ Nat zha biseata gal na' sa ba', bi'ilta di'izh ten Dios ndo' bexa, no btenxe'ata bexa, no bluuta bexa. ¹⁴ No mas binti'in ta ndák lu, ta msa'a Dios ndo' lu gor na mxo'ob bexa nchansu be men wa ya'a na gek lu, cha mbidi'izh bexa sakndo' Dios cuent ten lu.

¹⁵ Bin be ta ndee no dub ndo'tsa li bin, ndontsa ini'í be men le'a lu mas nsayák ndun lak nlad Dios. ¹⁶ Uzhebpa bla'ach xta'an ndun lu no xta'an nlu'u lu bexa. Tal lu dubtsa li gun, le'a lu gap gealnaban ndo' Dios no bexa na isakyo'ón ta ndadi'izh lu ba' wa.

5

Xte'e nsabndo' gak Timoteo ndo' be xmen Cristo

¹ No lá kuyo lu be xabgi'i gox, ndi btenxe'a bexa cuentta xus lu; no btenxe'a be xabgi'i ben cuentta wit lu. ² Btenxe'a be xagots gox cuentta xna'a lu; no btenxe'a be xagots ben cuentta bsan lu, ni na'anpa ugap gunbe'e lu.

³ Gokno be xagots ngut xabgi'i ten na, bexa lá ndapta ton ula'ach na. ⁴ Parea le'a tal ncho dub xagots ngut xabgi'i ten na wa ndap xa xin xa no xinxots xa, le'a bexa wa nsabndo' utsid xte'e gun bexa ta nlad Dios, ula'ach bexa ltsa'a xa wa, lak mla'ach xagots wa bexa. Le'a ta ndee ta wen nsak ladna Dios. ⁵ Parea le'a bexa na ngut xabgi'i ten na wa, bexa yá lá ndapta ton ula'ach, le'a bexa wa nsabndo' ige' ladna Dios no gudi'izhno xa Dios te'al tezhea. ⁶ Ná tal le'a bexa ndi ndun sbe'en ta nsak ladna bexa, le'a ndo' Dios le'a xa nak cuent dub xa ngutla maska bi nban xa. ⁷ Unibe'e be ta ndee ndo' bexa ba', ndontsa na'an ton xte'e iní'i ndo' bexa. ⁸ Le'a tal ton lá ula'ach bexa nchono xa no iteata be ltsa'a xa, le'a xa wa lá ndun lak nsabndo' gun be xmen Cristo, no mas ugap nak xa ndo' bexa lá ndangea ladna Cristo.

⁹ Le'a bexa na ngut xabgi'i ten na, bexa na ncho masla chon ga'al li'in, le'a bega nsabndo' gakno bexa wa, tal xa dubtsa xabgi'i wa ngwankea, ¹⁰ no tal ndab be men le'a xa wenka ndun, no utsin mla'ach xa be xin xa, no utsin mbin xa ndo' be men usea ta lid xa, no mbin xa ti'in ndo' be xmen Cristo, no ngokno xa bexa na kwea' uyo'obe, no sbe'en be ta wen mbin xa.

¹¹ Parea le'a be xagots ben bexa ngut xabgi'i ten na, na'anpa nsabndo' gakno bega xa, le'a gal gor le'a bexa nladgal uchilya'a, we'e le'a bexa yá

lá gunta ti'in ndo' Cristo. ¹² Le'a tal bexa li gun le'a bexa ndap ke ndo' Dios, le'a bexa lá ngun lak ndab bexa gor ned wa. ¹³ No le'a be xagots ben wa syak zha'ab, sbe'en ikesea xa be ta lid men. No sadi'izh bexa cuent gix, no sla'ach xa xta'an ndun be men, no sadi'izh xa be ta lá nsabndo' gudi'izh xa. ¹⁴ Ta we'e le'a na' nlad le'a be xagots ben ngut xabgi'i ten na wa ndi uchilya'a bexa, no gap bexa xin bexa, no ula'ach bexa ta lid bexa. We'e le'a be men na'anpa inisi bexa wa. ¹⁵ Li ndáp na' geal le'a ncho be xagots wa myach, cha ndi usankea bexa tso'o maxu'u.

¹⁶ Le'a tal ton dub xabgi'i natal dub xagots nak xmen Cristo, no ndap xa dub ltsa'a xa dub xagots ngut xabgi'i ten na, le'a xa wa nsabndo' ula'ach xagots wa, ndontsa na'anpa sbe'en gezh ten Dios gakno xa. We'e le'a bexa syo'o gan mas gakno be xagots na ta ugeaka lá ndap ton gakno xa.

Stapla ta'a ndab Pabl gun bexa

¹⁷ Le'a bexa na utsin nchansu be xmen Dios, le'a bega nsabndo' gap mod ndo' bexa no kix bega ika'a bexa. No mas li binno bega bexa na nluu di'izh ten Cristo. ¹⁸ Lak nkeani'i di'izh ten Dios, ndab-a: "Lá ko bega gix xe'e ngon gor na ndun ma ti'in." No ndab-a: "Le'a xa ndun ti'in nsabndo' yax ten na."

¹⁹ Na'anpa ula'ach lu tal ton usake dub xa nchansu be xmen Cristo tal xa na'anpa top natal chon xa. ²⁰ Le'a tal xa gunta ta ugap wa, uteyo xa wa ndo' ga'al itea bexa, ndontsa izheb bexa na'anpa no bexa li gun. ²¹ Le'a Dios no Jesucristo Xwan beuna no be angel ten Dios ndewi'i gáp na' ta ndee ndo' lu: gun lu lak ndab ta nke'a na'

ndee, ni na'anpa uti lu bexa nladtsa lu. ²² No gor na koxo'ob lu dub xa yansu gezh ten Dios, nsabndo' ned gunbe'e lu naga utsin nak xa. Le'a tal xa ndun dub ta ugap le'a be men gab le'a lu no ndap ke. Ndi umbi'itsa gok ndo' Dios.

²³ Le'a ta na sian biaj li ndakwea' len lu wa, lá goo lu nabtsa nits. Ndi goo lu nits yoo dub tuzh vin ndo'-yá.

²⁴ Le'a ncho bexa ndun dub ta ugap, cha uxax ini'í be men-a mas biseata usake dub xa-yá. No nchoga bexa cha'aw nlu'u be ta ugap ndun na.

²⁵ No liga ncho bexa ndun ta wen cha uxax ini'í be men-a. No ncho bexa ndun ta wen cha na'anpa nlu'u-yá, parea gal dub wizh le'a-yá ulu'uka.

6

¹ Le'a bexa ncha'ndo'o ndo' ya'a dub men, le'a bexa wa nsabndo' gap mod ndo' xa nak xwan bexa wa, ndontsa na'anpa inisi be men Dios no di'izh ten Dios. ² No tal ncho xwan xa no ndangea ladna Cristo, na'anpa ni lá gap bexa mod ndo' xa geal ta na no xa nak xmen Cristo. Ndi nsabndo' mas wen gun bexa ti'in ndo' xa wa, le'a xwan ti'in wa no nak xmen Cristo no nkwea' ladna Dios xa wa. Be ta ndee wa blu'u lu bexa no btenxe'a lu bexa.

Bexa nsankea tso'o med

³ Le'a tal ton nluu dub ta xa'aga, dub ta na'anpa nak lak nak gealngea ten Jesucristo Xwan beuna, ni na'anpa lak nlad Dios gak beuna, ⁴ le'a xa wa dub xa zhinpa, ná xa na'an xta'an ndák. Uzhebpa ndal ladna xa nyoto'o xa cuent

ten xte'e gab be di'izh. Ta we'e ndaklono xa dub xa ndap ta'a, no nyo bexa, no kwea' ní'i bexa ndo' ltsa'a xa, no na'anpa nge' ladna bexa ltsa'a xa. ⁵ No sbe'en li nyoto'o bexa geal le'a xa na'anpa le'a ndanbe'e no lá nchando' xa gealngea. Ni xa tal xa uchealtsa'a bexa ndankea Dios le'a xa sian med gun gan. Lá uchealtsa'a lu bexa li nak wa. ⁶ Le'a ta na ndun beuna ta nsak ladna Dios wa uzhebpa ndun wen yoo beuna, tal le'a beuna ntenno ladna be ta ndap beuna. ⁷ Lak ulansea beuna ndo' gizhliyo ndee na'an xta'an nseano beuna, no liga na'an xta'an yo'o beuna. ⁸ Ta we'e tal beuna ndap ta gawtsa beuna no xabtsa beuna, nsabndo' itenno ladna beuna ta wa.

⁹ Parea le'a bexa na nsankea tso'o med wa uxax ndaila' ndo' ya'a maxu'u. No uzhe'eb nsa'ab ladna bexa be ta na'an xti'in, ta na le'a gun kwea' yoo xa no sian gealkwea' ini'í xa.

¹⁰ Le'a ta na nsankea be men tso'o med wa, le'a ta wa nak xan itea be ta ugap. Le'a ncho bexa nsa'ab ladna sian med, ta we'e mla'a bexa nes ten Dios, cha sianpa gealkwea' uni'í bexa.

Ndab Pabl uzhebpa gun Timoteo juers

¹¹ Parea le'a lu Timoteo xmen Dios, bxo'on ndo' be ta ugap wa. Ndi ulo gan gun lu sbe'en ta wen, lak nsak ladna Dios. No mas bge' ladna lu Cristo, no bkwea' ladna lu be ltsa'a lu. No ulo gan uxik lu ndo' itea be ta'a, no bcha'an gok.

¹² Uzhebpa bin juers gun lu lak nsabndo' gun dub xa nge' ladna Cristo, we'e gap lu gealnaban nunk lá idub. Le'a Dios le'a mti lu gap lu gealnaban wa, no mbidi'izh lu ndo' kwa'ad men le'a lu

nge' ladna Cristo. ¹³ Le'a nat nsobwi'i Dios, xa na nsa'a gealnaban ndo' itea be ta ncho, no nsobwi'i Jesucristo, xa na utsin mbidi'izh ndo' ga'al Poncio Pilat, le'a na' gáp ndo' lu, ¹⁴ uxobgek lu ndo' iteanak be ta nlad Dios gun lu, we'e ni dub ke lá gap lu ndo' Dios. Li bin gast gal zha ilen Jesucristo Xwan beuna. ¹⁵ Le'a gal zha na nlad Dios, le'a Jesús ilenka. Le'a Dios dubkama nak Dios, nak xa Xwan iteanak be ta'a no Xa Nibe'e ndo' itea bexa nibe'e. ¹⁶ Le'a Dios dubkama nak xa na'anpa gat, xa ncho ndo' xe'a na'an ton ibii, xa ni dub men gol ni'í, no ni lá yoo gan ina' be men xa. ¡Idub tiemp gab beuna le'a Dios xa ndon le'a wen no idub tiemp nibe'e xa! Lika nak-a.

¹⁷ Le'a bexa na ndap sian be ta'a ndo' gizhliyo ndee, gud ndo' bexa lá izhinnona bexa-yá, no ni lá ige' ladna bexa ta wa, le'a ta wa uxax initndo'. Nsabndo' ndi ige' ladna bexa Dios nban, xa na le'a nsa'a itea be ta'a ndontsa wen yoo beuna.

¹⁸ Gud ndo' bexa wa utsin gak bexa no sian be ta wen gun bexa, no na'anpa uxin gak bexa. ¹⁹ Le'a ta wa cuent kocha'aw bexa sian be ta wen gibe'a, ta ika'a bexa tiemp ilen, no gap bexa gealnaban nunk lá idub.

Stapla be ta'a mtenxe'a Pabl Timoteo

²⁰ Timoteo, uzhebpa bla'ach ti'in msa'a Dios gun lu. Lá ula'ach lu be di'izh ugap ndadi'izh be men, le'a ta wa na'an xti'in. No lá ula'ach lu be gealkwi'in ndadi'izh be men, maska ndab bexa le'a-yá ta ugeaka. ²¹ Le'a ncho bexa usankea tso'o be ta wa, cha ndi mla'a bexa nes ten Dios.

Le'a Dios gun wen yoo ladna lu. Lika gak-a.

**Be di'izh nsa'a gealnaban
Zapoteco, San Vicente Coatlán: Be di'izh nsa'a
gealnaban New Testament**

copyright © 2015 Wycliffe Bible Translators, Inc.

Language: Zapotec, San Vicente Coatlán

Contributor: Wycliffe Bible Translators, Inc.

All rights reserved.

2020-11-30

PDF generated using Haiola and XeLaTeX on 31 Jan 2023 from source files
dated 29 Jan 2022

21c20591-ea7e-5ff5-b188-539398faf46d